

Izjava OHR-a na konferenciji za medije međunarodnih organizacija

Sjećanje na Svena Frederiksena

Dozvolite mi da ponovim riječi duboke žalosti koje je jučer izrazio visoki predstavnik nakon vijesti da je Sven Frederiksen, policijski komesar Evropske Unije za Bosnu i Hercegovinu, preminuo.

Sven je bio poštovan i veoma omiljen – njegove kolege ga neće zaboraviti i vjerujem da će ga se i mnogi građani ove zemlje sjećati sa dužnim poštovanjem. Misli svih nas iz Ureda visokog predstavnika su u ovom trenutku sa porodicom Svena Frederiksena i njihovim prijateljima.

Visoki predstavnik u posjeti Mostaru u utorak i srijedu

Visoki predstavnik će danas i sutra biti u Mostaru. U toku svoje posjete, nastavit će dijalog sa građanima, političkim predstavnicima i vodećim ljudima u ovom gradu. Visoki predstavnik je odlučan u iznalaženju rješenja za pitanje Mostara, što bi omogućilo dalje zalaganje da se unaprijedi životni standard građana Mostara i podstakne ekonomski razvoj Hercegovine i BiH u cjelosti, sa ciljem priključenja BiH Evropskoj porodici država.

Planiran je niz prilika za učešće medija o kojima ćete više saznati u obavještenju za medije koji se nalaze na stolovima napolju.

Nezavisna anketa ukazuje da građani Mostara žele jedinstven grad uz garancije o ravnomjernom učešću u vlasti

Prošle sedmice, agencija Partner provela je anketu uz učešće 1200 građana Mostara, po 200 iz svih šest mostarskih općina, u

kojoj je od njih zatraženo da odgovore kakvo ustrojstvo grada žele. Rezultati pokazuju da su građani Mostara često umjereniji i pronicljiviji od njihovih političkih vođa.

Što je najvažnije, nakon djelomičnih referenduma provedenih preko vikenda koji su ukazali na podršku jedinstvenom gradu, ova anketa pokazuje da je 83% Mostaraca protiv bilo kakvog rješenja problema Mostara koje bi omogućilo da samo jedan konstitutivni narod upravlja ovim gradom. Rješenje za Mostar može se temeljiti samo na interesu svih građana Mostara, a nikako na interesu samo jedne grupe. Ova anketa koju je proveo Partner pokazuje da svako rješenje problema Mostara mora poštovati dva principa: paralelizmi se moraju ukinuti, i ne smije biti dominacije jednog naroda nad drugima.

Ponio sam kopije rezultata ove ankete koje možete naći na stolovima napolju.

Visoki predstavnik je rekao jučer "Anketa koju je provela agencija Partner, i čiji rezultati su objavljeni danas, pokazuje da ogromna većina građana Mostara žele jedinstveni grad koji će djelovati u njihovu korist, uz garantirano ravnomjerno učešće u vlasti koje će spriječiti dominaciju bilo kojeg naroda.

Za razliku od refenduma koji je proveden u samo tri od ukupno šest općina preko vikenda, ova anketa pokazuje stavove građana Mostara u cjelosti. Rezultati su kategorični. 75 procenata ispitanika podržava ideju jedinstvenog grada. 83 procenata ne vjeruju da bilo koji narod treba upravljati gradom bez učešća ostalih u vlasti, i 81 procenat vjeruju da smo predugo čekali na rješavanje ovih problema.

Ova anketa ukazuje da je ogromna većina građana Mostara ozlojeđena čekanjem da se urgentni problemi njihovog grada riješe; da su ozlojeđeni praksom da se njihov novac od prikupljenih poreza troši na birokraciju umjesto na vitalne javne usluge; i konačno da su prije svega ozlojeđeni praksom

da političari stave svoje privatne interese ispred interesa građana.”

Agencija Partner provela je anketu uz učešće 1200 ljudi iz svih mostarskih općina.